



Giachen Giusep Berther

*** 19-03-1914 – † 24-06-1998**

Per il di da s. Giusep 1914 ha il zenn da s. Giachen tuccau ed annunziau il batten digl affon Giachen Giusep Berther. Ils 24 da zercladur 1998 han ils zenns da s. Vigeli annunziau la mort da Giachen Giusep.

Duront 84 onns, 3 meins e 5 dis ha el astgau viver denter nus. Cun ses geniturs (Gion Battesta ed Onna Maria Berther-Gaduff, cun duas soras ed in frar, eis el carschius si a Rueras.

Bia memia baul ei la mumma morta, ed il bab ha remplazzau ella aschi bein sco pusseivel. Els giuvens onns ha ei era tuccau al giuven Tuatschin da schigiar il paun jester. Turnond anavos ha la lavur dil puresser purtau paun e fadigia ad el.

Igl onn 1941 marida el la giuvna Catrina Berther da Dieni. Els secasan en casa paterna giudem il vitg. Treis buobas e treis buobs han purtau bia suleagl en lur letg. Giachen Giusep ei staus in ver pur, veramein in pur cun tgierp ed olma. Cun plascher e grond inschign barhava el sil funs ed en nuegl. Bein enconuschents fuva el era sco bien mazler da casa. Mo tier tut la lavur, astgava ina buna pipa tubac ed in scart troccas buca muncar. Entupan ins il defunct sin via, aveva el adina peda per in per buns plaids ed in bien cussegl. Gnanc l'uiara, ni onns da grevs quitaus, han saviu spogliar siu optimissem. Sper la lavur tgirava il Giachen Giusep siu hobi da vischler. Gl'emprem per agen diever e pli tard per far plascher als concertgauns. Uras ed uras ha el passentau en siu pign luvratori. En bein enqual stiva embellescha in burtget e regorda dil temps nua ch'el era aunc denter nus.

Gl'atun 1991 han Giachen Giusep e Catrina stuiu serender en casa s. Vigeli. Ils onns da vegliadetgna smaccavan sin la schuviala e la fleivlezia ha priu il surmaun. 1996 ha la Catrina priu cumiau da nus. Ils 24 da zercladur ha il car defunct priu cumiau da nus e dil mund terrester. Ina gronda cuminonza ha cumpignau il car defunct al santeri da s. Vigeli. Car Giachen Giusep, ruaussa en pasch, e sin seveser in di.